

Brief vom Samichlaus an die Kinder

Liebi Chind

Ich hoffe, es gahd üüch allne guet und ier sind gsund. Das ier gsund sind, isch hüür nid sälschtverschändlich. Wen ier wüssid und sicher au scho gmerkt hend, isch hüür nämlich es komisches Jahr. Es lauft nid alles so wie i andere Jahr. Öppe will ier vielleicht nid id Ferie hend chönne. Vielleicht hend ier au üüches Grossmami oder üüche Grossdädi im Früelig länger nid chönne gseeh. Oder will d'Lüüt und älteri Chind i de Läde, bim Cuafför, im Restaurant oder i de Schuel und im Chindsgi e Maske müend aallege. Wer weiss, bi jedem isch e chli öppis anders komisch gsii. Üüs allne tued das Virus nid guet. Aber mier chömid nid drumume, üüs dem e chli aaz'passe und s'Beschte druus z'mache.

Au miis Jahr isch nid e so gloffe, wie ich mier das vorgschtellet ha. Ich und de Schmutzli hend s ganz Jahr e Maske a gha. Und ich ha mich s ganz Jahr bsunders gschooned, dass ich üüch im Dezämber de cha go bsueche. Aber jetzt isch es eso, dass mier üüs möglichscht nid söttid traffe. Au wenn ich immer gsund blibe bi und das Virus nicht überchoo ha, bi ich doch schon en alte Maa und muess drum bsunders uufpasse, das ich mich und üüch nid aastecke mit dere Chranked. Das wettid mier doch e so bhalte. Drum chan ich hüür mit em Schmutzli nid zu üüch id Stube ine cho. Das macht mich ganz fescht truurig und ich vermisse üüch jetzt scho.

Ich ha üüch aber nid vergässe. Zäme mit em Schmutzli han ich für üüch zwei drüü Film vorbereitet, wo ier mit üüchem Mami oder üüchem Dädi im Computer chönd aaluge. I eim Film verzell ich üüch d Legände vom Samichlaus. Das isch e Gschicht. Spitzid d'Ohre und losid guet zue. Und nach de Gschicht chönd ier s'Fänschter i üüchere Wohnig uuftue und guet lose. Wer weiss, vielleicht ghörid ier mich und de Schmutzli am Samschtigaabig ja.

Luegid guet zu üüch, sind brav, folgid a üüchne Eltere und luegid vor allem, dass ier gsund bliibid. Das isch ganz eifach: wäschid jedesmal ganz guet mit Seifi d Händ, wenn ier vo verusse is Huus ine chömid, vor em Ässe, und nachdem ier ufs WC gange sind. Tüend au immer schön i Ellboge ine hueschte oder nüüsse. De sött nid passiere, und ich cha üüch mit mim Schmutzli s'nächst Jahr hoffentlich wieder go bsueche. Ich plange jetzt scho ganz fescht druuf.

Ich wünsche üüch allne trotz allem e bsinnlichi Adväntsziit und de schöni Wiehnachte. Machid's guet und bliibid gsund!

Liebi Grüess vo üüchem

Samichlaus